

共同經課 - 1 以賽亞書六十五章十七節~二十五節

17 看啊！我創造新天新地；以前的事無閣記念，亦無閣追想。18 恁著因為我所創造的來永遠歡喜快樂；因為我創造耶路撒冷做歡喜的，創造伊的百姓做快樂的。19 我欲因為耶路撒冷來歡喜，因為我的百姓來快樂；其中的確無閣聽見啼哭的聲及哀哮的聲。20 其中的確無有幾日仔死去的嬰仔，亦無有歲壽無滿足的老人；因為一百歲死者猶算是囡仔，一百歲死的罪人猶久是受咒詛的。21 in欲起厝，家已倚起；栽種葡萄園，來食伊的果子。22 in無欲起造，互別人倚伊；in無欲栽種，互別人食伊；因為我的百姓的日子欲親像樹的日子；我揀的百姓親手著磨得著的欲久長享受伊。23 in的確無空空著磨，所生者亦無抵著災害，因為in攏是得著耶和華賜福者的後裔；in的子孫亦欲及伊有份。24 in猶未求叫，我就應伊；抵抵啲講的時，我就聽伊。25 豺狼欲及羊羔相及食；獅欲食草親像牛；土粉欲做蛇的食物。佇我的聖山遍地，攏無損傷，無殘害。這是耶和華講的。

共同經課 - 2 以賽亞書十二章

1 到彼日你欲講：耶和華啊，我欲感謝你！因為你雖然曾受氣我，今你的受氣已經息；你亦安慰我。2 看啊！上帝是拯救我者；我欲倚靠伊，亦無驚。因為主耶和華是我的氣力，是我的詩歌，伊亦成做救我者。3 恁欲對救恩的水泉歡喜來汲水。4 佇彼日，恁欲講：著感謝耶和華，求叫伊的名；將伊所行的報揚佇列邦中，講起伊的名已經受尊做高。5 恁著唱歌謳唸耶和華，因為伊所行的真顯赫；願此個代誌遍傳佇天下。6 錫安倚起的百姓啊，恁著出大歡喜的聲，因為以色列的聖者佇恁的中間做大。

共同經課 - 2 詩篇一百一十八篇

1 恁著感謝耶和華，因為伊是好；因為伊的慈愛永遠佇啲！2 願以色列講：伊的慈愛永遠佇啲！3 願亞倫的家講：伊的慈愛永遠佇啲！4 願敬畏耶和華的人講：伊的慈愛永遠佇啲！5 我佇危急的中間求叫耶和華，耶和華就應我，將我下佇寬闊的所在。6 有耶和華及我佇啲，我就無驚，人欲啥法得我奈何？7 佇許個幫助我者的中間，有耶和華及我佇啲，所以我欲看見許個怨恨我的人受報應。8 倚靠耶和華，比倚靠人卡好；9 倚靠耶和華，比倚靠王親卡好。10 萬百姓圍攏我，我倚靠耶和華的名欲剿滅in。11 in圍我，困我，我倚靠耶和華的名欲剿滅in。12 in親像蜂圍我，親像燒荊帕的火，受拍熄；我倚靠耶和華的名，欲剿滅in。13 你出力揸我，欲互我倒，總是耶和華幫助我。14 耶和華是我的氣力，是我的詩歌；伊亦成做拯救我的。15 佇義人的布棚內，有歡喜的聲，拯救的聲；耶和華的正手施出大權能。16 耶和華的正手抬高；耶和華的正手施出大權能。17 我袂致到死，猶會活啲，續欲報揚耶和華的所做。18 耶和華曾嚴嚴警戒我，總是未有將我交佇死無。19 著給我開義的門；我欲入去感謝耶和華！20 這是耶和華的門；義的人欲入去！21 我欲感謝你，因為你已經應我，閣成做拯救我者！22 師傅所棄揀的石，已經成做厝角頭的石。23 這是耶和華所做的，咱的目睭看伊做奇怪。24 這是耶和華所定著的日，咱佇此日的中間欲歡喜快樂！25 耶和華啊！今求你拯救！耶和華啊，今求你互阮發達！26 奉耶和華的名來者應該得著福氣！阮對耶和華的厝給恁祝福！27 耶和華是上帝；伊的光照阮。著用索縛祭祀的精牲，到壇角。28 你是我的上帝，我欲感謝你！你是我的上帝，我欲尊你做高！29 恁著感謝耶和華，因為伊是好！因為伊的慈愛永遠佇啲！

共同經課 - 3 帖撒羅尼迦後書三章六節~十三節

6 兄弟啊，阮佇咱的主耶穌基督的名命令恁，見若兄弟無法度，無照阮所傳授的來行，恁著離開伊。7 因為恁家已知著怎樣學阮。因為阮佇恁中間，未曾無法度，8 也毋曾白白食人，反轉是著磨艱苦，暝日做工，免得拖累恁中間一人。9 毋是因為阮無權，獨獨是愛用本身做恁的模樣，互恁學阮。10 因為阮猶及恁佇啲的時，曾按呢命令恁講，若有人無欲做工，伊也著毋通食。11 是阮聽見，恁中間有人所行無法度，攏無做工，干單做份外的事。12 親像此號人阮惦佇主耶穌基督命令in，閣勸in，著恬靜做工，家已趁食。13 兄弟啊，恁行好事毋通厭倦。

共同經課 - 4 路加福音二十一章五節~十九節

5 有人講起殿堂是用好石及所獻的物來妝飾；彼時耶穌講：6 「恁所看見許個物，日子欲到，佇遮欲無一塊石留佇石的頂面，也無掉落去。」7 in就問伊講：「先生啊！按呢甚麼時欲有許個事？閣諸個事欲成的時有甚麼兆頭啊？」8 耶穌講：「著謹慎，免得受迷惑；因為欲有許多人託我的名來，講：『我就是基督』，閣講：『時近啦』，恁毋通去隨in！9 恁欲聽見交戰及擾亂的事，彼時毋免驚惶；因為諸個代誌的確代先有，總是末期無連鞭到。」10 就給in講：「百姓欲起來攻擊百姓，國也欲起來攻擊國；11 地欲大振動，也多多所在有飢荒、瘟疫，對天裡也欲有通驚的象及大的神蹟。12 諸個事的代先，人欲下手掠恁，窘逐恁，將恁送交佇會堂，及監牢，也為著我的名帶恁到佇君王、官府的面前。13 諸個事欲成做恁的干證。14 所以，恁的心志著決斷，無代先掛慮欲怎樣分訴；15 因為我欲賞賜恁口才、智慧，就是恁的眾對敵所袂會抵當、辯駁的。16 恁也欲互父母、兄弟、親戚、朋友解送；17 恁中間有的欲互in害死。恁因為我的名欲互眾人怨恨，18 總是，恁一支頭毛也袂失落。19 恁用吞嚥，得著恁的活命。」